



Gabinete Wever - Croes II

ISLAONLINE

Noticia di Gobierno

2023

Diabierna 21 Juli 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



GRADUADO DI UNIVERSIDAD DI ARUBA NADIEN PHILLIP A HACI ENTREGA DI SU TESIS NA PROME MINISTER



E siman aki Prome Minister a ricibi bishita di Nadien Phillip kende recientemente a gradua como Bachelor den Organization, Governance and Management (OGM). Durante di su bishita, Nadien a conta Prome Minister di su tesis titula: "Leadership Frame of Aruba's Prime Minister During the COVID-19 Pandemic 2020-2021. A study on how Aruba was lead thru adversity", cual el a defende exitosamente.

E estudio cu Nadien a haci ta tocante e liderazgo di Prome Minister Wever - Croes durante di e pandemia COVID-19. Nadien a splica cu el a entrevista lidernan di organisacionnan gubernamental y no-gubernamental, y tambe personal di oficina di Prome Minister. Pa analisa e informacion, Nadien a haci uzo di un framework yama: "The Four Frame Model by Bolman & Deal", cual ta dividi e concepto di liderazgo den 4 diferente categoria esta: (1) Structural Frame, (2) Human Resources Frame, (3) Symbolic Frame (4) Political Frame.

Impacto positivo

For di e investigacion cu Nadien a haci, por a conclui cu Prome Minister a desplega un estilo di liderazgo varia "Multi-Frame". Pues Prome Minister tabatin un acercamento diferente pa atende diferente aspecto durante e pandemia. Esaki por cierto ta loke e desaroyadornan di e framework tambe ta recomenda. Ademá, e estudio a muestra cu e liderazgo di Prome Minister

tabatin un impacto positivo riba e tareanan diario di e organisacionnan durante crisis.

A base di e resultadonan di e investigacion, Nadien a propone diferente recomendacion pa organisacionnan por ta miho prepara den caso di crisis "crisis management policies", entre otro: Pa percura pa tin un structura di trabou cla defini cu tur empleado sa nan tarea y proceso di comunicacion. Esaki ta promove eficiencia, union y planificacion di trabou. E siguiente recomendacion ta pa practica empatia. E estudionan a muestra cu lidernan cu ta accesibel y habri pa feedback ta mas aprecia durante crisis. Un otro recomendacion ta pa tin un vision fuerte cu ta conecta cu e maneho durante crisis, sin perde bista di futuro pasobra esaki ta yuda pa e team keda enfoca riba e meta comun.

Prome Minister a finalisa gradiciendo Nadien pa e estudio cu el a realiza cual ta documenta experiencianan di un periodo dificil cu Aruba y mundo a pasa aden. "Mi no tawata sa cu Nadien tawata trahado riba e topico aki pa defende su tesis, aunke si mi tawata cu el a entrevista hopi persona rond di mi. Ora cu Nadien a conta mi kico tur el a haci, el a yena mi cu hopi emocion. Pasobra Aruba completo a pasa momentonan duro y dificil durante e pandemia, hopi sacrificianan a wordo haci pa nos tur. Mi no a spera di haya un buki na mi honor pa e liderazgo cu mi a hiba durante e periodo aki, pero e ta yena mi cu un satisfaccion hopi grandi cu tur esnan cu a traha duro durante e pandemia, ta haya un reconocimiento asina", Prome Minister a expresa.

E estudio aki ta yuda pa documenta e historia di e periodo di adversidad mas dificil cu nos pueblo a pasa aden den nos era moderno, temponan duro na unda cada ciudadano a wordo poni na prueba pero a sa di uni, muestra amor y respet pa otro y pa reglanan. Nos a muestra con fuerte y resiliente nos ta como Arubiano. Y awe nos ta mira cu Aruba recuperando como un di e paisnan cu ta recuperando mas fuertemente.

Prome Minister ta desea Nadien tur clase di exito den su carrera.

Prome Minister Evelyn Wever-Croes:

PROME MINISTER TA FELICITA E COMUNIDAD COLOMBIANO RIBA NAN DIA DI INDEPENDENCIA

Gobierno di Aruba diahuebs 20 di juli a uni cu e comunidad Colombiano na Aruba den e celebracion di nan di 213 aña di independencia. E Consulado General di Colombia, Sr Gustavo Serrano Amaya, a organisa un ceremonia protocolar riba Plaza Simon Bolivar pa conmemora e fecha y a hiba palabra na inicio di e celebracion. Presente na e ocasion tawata Cuerpo Consular Aruba y directornan di Deptamentonan di Cultura, Censo y DBB. Minister Ursell Arends, como Vice Premier, Presidente di Parlamento señor Edgard Vrolijk y Minister Glenbert Croes tambe a hiba palabra. Tambe a tuma luga ofrendanan floral.

Na Aruba tin un colonia grandi di colombiano ta biba, algun ya pa di tres generacion. Danki na tur ciudadano Colombiano cu a laga nan hogar pa bin yuda nos desaroya nos economia y a keda den tempo bon y den tempo menos bon. Colombia ta hunga un papel hopi importante den nos economia y salud y Gobierno di Aruba kier sigui desaroya y mantene e lasonan ak.

Prome Minister ta gradici e comunidad di Colombia y alabes ta felicita nan cu nan Dia di Independencia. “Aruba ta den recuperacion y ta necesario pa nos keda uni pa asina hunto nos logra vence cada reto nos dilanti den bienestar y progreso di nos comunidadnan. Pabien na e comunidad di Colombia residencia na Aruba y danki pa boso contribucion na economia di nos pais”, Prome Minister Evelyn Wever-Croes a expresa.

Prome Minister ta gradici tambe DOW pa e trabounan di limpiesa cu a wordo haci riba Plaza Simon Bolivar en conexion cu e ceremonia protocolar di celebracion di Dia di Independencia di Colombia.





Ursell Arends
MINISTER

MINISTER URSELL ARENDS TA ABORDA E AVALANCHA DI INFORMACIONNAN INCORRECTO DEN ULTIMO SIMANNAN

Durante conferencia di prensa Minister di Naturalesa a tuma e oportunidad pa aclaria e avalancha di mal informacion cu a bin ta scucha den comunidad pa loke ta trata e situacion entre Gobierno di Aruba y Embassy Suites.

Segun Minister Arends, e narrativa cu mas a purba di bende ta cu e minister lo a comparti informacion confidencial cu abogado di Aruba Birdlife Conservation(ABC). "Abogado di Embassy Suites no ta splica of bisa kico e ta yama informacion confidencial. Den tur transparencia por bisa cu den ningun discusion cu e abogado a menciona cualkier informacion cu lo por ta confidencial." Minister Arends ta expresa.

Un otro ponencia cu ta incorrecto ta cu Minister Arends ta actuando contra decision di Minister President kende ta encarga cu infraestructura. Tambe, cu tin deferencia entre 'aanlegvergunning' y 'ontheffing'. E berdad Minister di Infraestructura ta duna e aanlegvergunning cual ta permiso pa construi pero permiso aki ta condicional (voorwaardelijk) na permiso di excepcion (ontheffing) cual ta tene cuenta cu especienan protehi den nos naturalesa. Ta importante pa menciona cu cada un di e dos permisonan aki tin dos diferente evaluacion tambe.

Tambe ta bisa cu e sucedido riba dia 22 juli 2023, unda Minister Arends a presenta fisicamente na e sitio caminda destruccion di naturalesa tabata tumando luga, tabata un "blunder". Riba esaki Minister a reacciona bisando cu "si e no a presenta e dia ey, awe no lo a resta nada pa defende."

Terminando, Minister Arends ta lamenta cu ta purba di hiba



e discussion aki na media cu informacion incorrecto. Esaki mirando cu a sinta na mesa y a purba dialoga pa haya solucion cu ta pone desaroyo y naturalesa den balansa.

"E preservacion di nos naturalesa ta crucial pa nos economia y nos bienestar riba aruba, lo mi sigui defende naturalesa cu tur e instrumentonan cu ley ta duna nos." - Minister Ursell Arends.



IMSAN A HACI E DESVELO OFICIAL DI NAN CELLO DI E ACREDITACION DI JCI

“Un dia grandi y historico pa cuida medico na Aruba”



Diabierna atardi Minister di Turismo y Salud Publico sr. Dangui Oduber tabata na ImSan. Aki e mandatario a hiba palabra na e ceremonia caminda a celebra e desvelo oficial di e Certificado di e “Gold Seal of approval accreditation di Joint Commission International (JCI)”.

E tabata un atardi historico caminda tabata tin presente coleganan Minister, miembronan di Parlamento, director di ImSan sr. Rainjherc, director di AZV sr. Jacobs, empledonan di ImSan y demas invitadonan.

Segun e mandatario e acreditacion di JCI no ta wak solamente e calidad di cuida y servicio cu sigur ta di vital importancia, pero ta pone seguridad di pashentnan y trahadornan tambe como prioridad pa set e standard di mas halto cu por existi. Minister Oduber a splica cu pa haya e acreditacion aki no ta algo nada facil. Un acreditacion cu ta renombra mundialmente, ImSan ta e prome hospital cu e acreditacion aki den full e region di Caribe Hulandes. E mandatario a sigui bisa cu e standard cu ImSan a pone pa Aruba su calidad di cuida medico ta uno di nivel mundial. E ta e standard cu nos kier ofrece na nos aseguradonan pero tambe na nos bishitantenan. Cu esaki



nos tambe lo bai explora turismo medico minister Oduber ta expresa.

E maneho di Ministerio di Salud Publico ta dirigi riba mehora e calidad di cuida y servicio. Pa percursa pa haci inversionan continuo den cuida medico, enfocando riba prevencion y percursa pa Aruba por mantene e gastonan medico pagabel, manteniendo un fondo di azv sostenibel.

E mandatario a reconoce e vision y perseverancia cu dr. Rainjherc Y su team a tabata tin y a realiza pa awe oficialmente ImSan tin e JCI accreditation. Mester bisa cu esaki no tabata por ta posibel tampoco sin e vision di Ex Minister di Salud Publico sr. Booshi Wever (cu a forma parti di Gabinete Oduber 3). E tabata tin e determinacion y vision pa bin cu un Instituto Medico na San Nicolas.

Minister Oduber a gradici dr. Rainjherc y full e team di ImSan cu a traha duro pa ricibi e acreditacion aki. Pa e mandatario e tabata un orguyo di por a celebra e gran e logro historico aki hunto cu ImSan su management, staff y full e personal. Danki un biaha mas pa e excelente trabou di cuida y servicio.

Continuacion POTRETNAN DI DESVELO OFICIAL NA IMSAN....





FINALISACION DI E AGRI BUSINESS ACADEMY



Despues di e programa di Agri Business Academy (ABA). Minister di asuntonan economico, Sr. mr Geoffrey Wever, conhunto cu minister di naturalesa, Sr. Ursell Arends, tawata presenta pa e culminacion di e proyecto aki.

E sector di agricultura tin e potencial di bira un sector economico importante cu por contribui na e diversificacion di nos economia na Aruba. Pa e motibo aki Minister Arends y Minister Wever hunto cu Qredits a organisa e Agri Business Academy pa stimula empresarionan den agricultura.

Meta di e Agri Business Academy ta pa yuda (futuro) empresarionan yega na nan meta door di ofrece nan e conocimiento pa cuminsa of sigui opera un negoshi agricola exitosamente den e sector di agricultura. E programa a finalisa cu un "Pitch" unda cada participante a haya e oportunidad pa

presenta nan producto/servicio.

Minister Geoffrey Wever y Minister Ursell Arends ta desea cada graduado tur clase di exito cu nan proximo etapa profesional. Ta spera cu e Agri Business Academy por forma un parti integral den logra realisa nan proyectonan, y asina contribui na un futuro exitoso y ta gradici Qredits pa e cooperacion y pa traha cu Gobierno di Aruba na beneficio di economia di Aruba y agricultura di Aruba.





MINISTER ENDY CROES A ATENDE CEREMONIA PROTOCOLAR PA CONMEMORA DIA DI INDEPENDENCIA DI COLOMBIA 20 DE JULIO



Riba 20 di juli 2023, Minister Endy Croes, a atende e ceremonia protocolar en conexon cu 213 aña di Independencia di Colombia. Un bunita ceremonia a tuma luga na Plaza Libertador Simón Bolívar. Consul di Colombia, Sr. Gustavo Serrano Amaya, Vice Prome Minister Ursell Arends, Minister Glenbert Croes y Presidente di Parlamento, mr. Edgard Vrolijk, a hiba palabra na e ocasion special aki. Sigur bunita palabranan den e diferente discursonan a keda presenta. Sigui pa presentacion di ofrenda floral pa e dignatarionan.

Minister Geoffrey Wever, Parlamentario Sra. Shailiny Tromp-Lee y Sr. Hendrik Tevreden y director di diferente departamento di gobierno tambe tabata presente na e mainta special aki. Nos Gran Libertador Betico Croes a bisa: “Arubiano no ta solamente esnan cu a nace akinan, sino tur cu a haci Aruba nan hogar”. Masha pabien na tur Colombiano rond di mundo. Na tur Colombiano residencia aki na Aruba cu a yuda cu nos desaroyo, progreso y a contribui na e bienestar di nos pais Aruba un palabra di gratitud for di profundo di nos curason.



Positivismo ta un factor importante pa logra union. Ora cu famianan y comunidadnan ta traha hunto pa metanan comun, e chens pa exito ta bira mas grandi. Tambe e ta crea un ambiente mas stabiel y harmonioso cu ta necesario pa e crecimiento y desaroyo di un sociedad.